

# Jon

## ndê bapia tilu-nga

### Yom whê bapia dindec sa-nga

Lau tigauc daêsam sêsôm bu Jon, naŋ Yisu ndê aposel daŋ, naŋ to bapia dindec, magoc iŋ sam dau bu 'ngac bata' daŋ, ma to dau ndê ɲaê dom. Iŋ to bapia dindec têtŋ awhê daŋ ti ndê balêkoc (1, 4-5), ma yêc bapia dau ɲambu-nga, Jon kêtŋ acsalô têtŋ awhê dau akêtŋ iŋ dôwawê daŋ ndê balêkoc (13). Lau daêsam gauc gêm bu yom pi awhê lu dinaŋ hêganôŋ gôlôwac dabuŋ toŋ lu, ma yom pi iŋlu si balêkoc, naŋ hêganôŋ lau sêkêtŋ whiŋ-nga naŋ sêmbo gôlôwac dau ɲalôm.

Jon to bapia dindec tu puc ɲac dônŋ bu sêsap yom ɲandô ma mêtê atac whiŋ-nga dônŋ. Iŋ kêtŋ puc ɲac pi lau naŋ sêndôhônŋ yom tasanŋ, naŋ sêsêc yom ɲandô pi Yisu ahuc, ma sêsôm bu Yisu iŋ Anötô ndê Atu dom. Jon sôm têtŋ lau sêkêtŋ whiŋ-nga bu sêmbo ahê lau kaiŋ dinaŋ hoŋ.

---

### Jon gêm mbec lau

<sup>1</sup>Aô ngac bata dec, gato yom têtŋ am awhê naŋ Anötô kêyalinŋ am sa su, ma têtŋ am nem balêkoc. Yac hoŋ dasap yom ɲandô dônŋ, ma tu dinaŋ-nga aô tac whiŋ mac kêlêc. Aô taŋwasêŋ dom, lau hoŋ naŋ sêŋyalê yom ɲandô, naŋ atac whiŋ mac sêwhiŋ. <sup>2</sup>Ŋahu bu yom ɲandô yêc yac neŋ ɲalôm, ma oc yêc yac ɲalôm ɲapaŋ. <sup>3</sup>Damaŋ Anötô lu iŋ ndê Atu Yisu Kilisi si mwasiŋ ti tawalô ma yom malô whiŋ yac lau naŋ dasap yom ɲandô ti mêtê atac whiŋ-nga dônŋ.

### Yom ɲandô ma mêtê atac whiŋ-nga

<sup>4</sup>Aô gatap mac nem balêkoc ɲatô sa, ma aô galic bu ɲac sêsa lêtŋ yom ɲandô-nga sêŋkuc yomsu naŋ Damaŋ Anötô kêtŋ têtŋ yac. Tu dinaŋ-nga aô atac ɲayham atu. <sup>5</sup>O awhê ɲayham, kwahic dec aô bu wateŋ mac bu asap yomsu dau dônŋ ɲapaŋ. Yac hoŋ dakôc yomsu dau sa, têtŋ ndoc yac dakêtŋ whiŋ tiwakuc. Ma bocdinaŋ dec aô gato tôm yomsu wakuc dom. Ma yomsu dau bocdec bu, yac atac whiŋ neŋ asidôwai dandic ɲawaê.

<sup>6</sup>Ma mêtê atac whiŋ-ŋga ŋahu bocdec bu, yac dasa neŋ lêŋ ti daŋaŋ wambu Anötö ndê yomsu. Yomsu dau mac aŋgô têtŋ ndoc mac akêtŋ whiŋ tiwakuc, ma yêc bocdec bu, asa nem lêtŋ ti asap mêtê atac whiŋ-ŋga dôŋ.

<sup>7</sup>Lau tasanŋ daêsam sêmbo nom, naŋ sêsôm bu Anötö ndê Mesaya meŋ mbo nom ti ŋamalac ŋandô dom, ma bocdinaŋ sêsêc yom ŋandô pi Yisu ahuc. Asa naŋ sôm yom dinaŋ, iŋ tasanŋ dinda ma Kilisi ndê ŋacyo. <sup>8</sup>Bocdinaŋ ayob daôm ŋapep bu sêŋsau mac e aso ŋandô ŋayham naŋ mac am gweleŋ atu bu atap sa-ŋga, naŋ dom. Alhac ŋaŋga, tu bu atap ŋandô dau sa. <sup>9</sup>Bu asa naŋ kêdôhônŋ yom naŋ so yom ŋandô pi Yisu Kilisi, naŋ meŋ akêtŋ Anötö ndê dom. Magoc asa naŋ sap yom ŋandô pi Yisu dôŋ ŋapaŋ, naŋ ti Damba ndê, ma ti Atu ndê gêtŋ whiŋ. <sup>10</sup>Asa naŋ bu têtŋ mac meŋ, magoc êndôhônŋ yom ŋandô pi Yisu dom, naŋ akôc iŋ sa pi nem andu dom, ma akam iŋ dom. <sup>11</sup>Bu asa naŋ kôc ŋamalac kaiŋ dinaŋ sa, naŋ wêkaiŋ iŋ ndê gweleŋ sac dinaŋ whiŋ.

### **Yom ŋambu-ŋga**

<sup>12</sup>Yom daêsam yêc bu wakêtŋ têtŋ mac, tigeŋ aô bu wato sip bapia dindec dom. Aô gakêtŋ batanŋ bu wandic mac kêsi, goc danem yom-galôm aŋônŋ andô pitigeŋ. Ma boc-dinaŋ yac oc datisambuc. <sup>13</sup>Am dôwamwê naŋ Anötö kêyalij sa yêc gameŋ dindec, naŋ ndê balêkoc sêkôm acsalô ŋayham têtŋ mac.